

畿輔通志卷一百六十六

略一百二十一 古蹟十三 陵墓二 順天二

順天府

良鄉縣

周廣成君樂毅墓在縣南三里城塚記墓在縣治南三里近廬

溝堤決役夫與墓碑築堤恐後無徵矣胡祭酒集按樂毅卒於趙

當是返葬於此今其墓地大數畝高丈餘題曰望諸墓其來

已久無年月日下舊聞考柳宗元弔樂生文并序許縱

聞而哀之其返也與之文使弔焉辭曰大厦之鶩兮風雨萃
之車亡其軸兮乘者棄之嗚呼夫子兮不幸類之尙何爲哉
昭不可留兮道不可常畏死疾走兮狂顧傍徨燕復爲齊兮
東海洋洋嗟夫子之專直兮不慮後而爲防胡去規而就矩
兮卒陷滯以流亡惜功美之不就兮俾愚昧之周章豈夫子
之不能兮無亦惡是之遑遑仁夫對趙之惻款兮誠不忍其
故邦君子之容與兮彌億載而愈光諒遭時之不然兮匪謀
慮之不長踞陳辭以隕涕兮仰視天之茫茫苟偷世之未可

兮信余心之不臧 湯顯祖弔望諸君墓詩昭王靈氣久疎
燕今日登臺弔望諸 一自蒯生流淚後幾人曾讀報燕書
邵雍詠樂毅詩樂毅事燕時其心有深旨破齊七十城迎刃
不遺矢其留卽墨莒卻與燕有二欲使燕遂王天平自齊始
豈意志未伸昭王一旦死惠王固不知使人代其位強燕自
此衰何能復振起自古君與臣際會非容易重惜千萬年英
雄爲流涕 丁煒詩擇主間關作合難乘時建策獨登壇師
連五國前仇雪功墜三城霸業殘故鼎空嗟淪灌莽荒墳誰
復拜衣冠秋風落日生
憑弔卻憶遺書灑淚寒

謹按今廣平府邯鄲縣亦有毅墓廣平府志引史記注張
華曰望諸君塚在邯鄲縣西數里又引元和志樂毅墓在
縣西南十八里並引輿地要覽樂毅墓在邯鄲今城東南
二十里故跡猶存考史記樂毅卒於趙墓亦應在邯鄲但
魏書盧道將傳道將爲燕郡大守下車表樂毅霍原之墓
而爲之立祠則墓之在良鄉亦非無據豈當時卒葬於趙
而子孫之留於燕者葬其衣冠歟

隋楊君讓墓在陽鄉舊店西有古碑名勝志按墓今無考下舊日

聞考

唐雲麾將軍李秀墓范陽李秀唐明皇時以功拜雲麾將軍

左豹韜衛翊府中郎將封遼西郡開國公卒於開元四年葬

范陽福祿鄉

春明夢餘錄 謹按水經注廣陽水出小廣陽西山東流逕廣陽故城北又東福祿水出焉福

祿鄉蓋因水得名又考方輿紀要廣陽城在縣東八里據此則墓亦應在今縣東廣陽故城之東 唐雲麾將

軍李秀碑李邕撰并行書天寶元載正月立金石錄

唐劉濟墓在縣境

唐權德輿幽州盧龍節度副大使贈太師劉公墓誌銘析木之下幽陵碣石融結細

縕誕靈熊渾乃生元臣以翼大君惟彭城郡王宣力三代撫封四紀在德宗朝纂服舊勞以亞丞相得顯征伐冬官夏卿再踐六職乃列台宰乃居師長在順宗朝論道進律就加司空又拜司徒今皇帝聰明齊聖褒厚功德擢侍中中書令繼繆樞衡臨長諸侯元袞赤舄崇其物采九命二伯極其名器勳猷備其贊畫終始焯於代家五年秋七月寢疾薨於莫州之解舍享年五十四冬十月歸全涿州良鄉縣之某原追錫太師不視朝三日命諫議大夫弔祠法賻廷尉卿持節禮冊

又詔宰臣德輿銘於壽堂所以加恩報勞始終滲漏之澤也
 公姓劉氏諱濟字濟之蜀昭烈皇帝二十一代孫曾祖宏遠
 皇檢校司衛卿臨洮軍使襲彭城郡公贈宋州刺史祖貢皇
 特進左金吾衛大將軍贈揚州大都督父怱皇幽州盧龍節
 度觀察等使御史大夫贈司徒恭公公承是覆露生而岐嶷
 深而通直而和宏毅忠肅端明溫重固已蘊絕人之姿挺希
 代之器始以門子橫經游京師有司擢上第參幽州軍事轉
 兵曹掾歷范陽令考績皆爲府中最興元初以太子家令爲
 莫州刺史以御史中丞爲行軍司馬凡吏理之慰薦輿師之
 拊養如良庖之無脣宜翳良農之無滅裂司徒卽代有詔奪
 情節哀順變講信修睦先公之封畛盡在長帥之威惠畢舉
 比歲大旱螽蝗爲災絜齋蔬菲默以心禱甘雨祁祁嘉生莠
 莠因其豐登示以班制古諸侯之令典靡不具焉貞元初烏
 桓誘北方之戎幸吾阻飢大聳邊鄙公先計後戰陳兵於郊
 乃遣單車使者誘掖教告繇是諸戎皆爲公用朝不庭方厥
 猷茂焉明年鮮卑墨乙之犯古漁陽其後啜刺寇右北平公
 分命左右軍異道並出然以中堅衝擊士不離傷師不留行
 深入其阻抵青都山下捕斬首虜以萬級獲橐駝馬牛羊無
 萬數十九年林胡率諸部侵淫於瀟薊之北公親統革車會
 九國室韋之師以討焉飲馬灤河之上揚旌冷陁之北戎王
 棄其國遜去公署南部落刺史爲王而還登山踞石著北伐
 銘以見志自太行以東懷和四鄰或歸其天倫或復其地理
 警急則解其顛末居常則納諸矩度兵興以來氣俗相因或
 以夸敗度或以美沒禮比屋之人被縵胡而揮孟勞不知書

術公乃修先師祠堂選幼壯孝悌之倫春秋二仲行釋菜鄉
飲之禮生徒俎豆若在洙泗和門耽耽公署沈沈自從事掾
史迨紀綱之僕庠序有倫采章不紊接士必下以詞氣推賢
而容其出處隴西李益樂安任公叔皆以賓筵薦延至郎吏
二千石近臣良守此又烈丈夫大君子曠度犖犖之爲也其
於勤身裕物生聚教訓祈寒則頒之絮帛大歉則賑之倉廩
一方之人蒙被惠和嘉祥交於動植孝順浹於州壤美化周
行無不及焉去年冬土師問罪於常山公率先蹈厲累上功
捷引義慷慨賦詩以獻詔宰司序引百執事屬和以美大之
師次瀛州旣圍樂壽又遣支兵急攻安平三旬未下武怒益
奮命其子總以騎士八千先登公親鼓之士皆殊死戰亭午
而拔誅屠無噍類蓋所以宣威制勝於可必也天子賜以寶
劍金甲彤弓盧矢方董諸侯之師將覆其巢俄感厲氣隱几
口占署總軍司馬曰無以吾故而稽天誅悉召戲下以須王
命俄而下需然之詔宥罪班師加公寵渥已至大病遺章惴
欵不及家事天下之人偉其忠勞總以君命起於倚廬之中
委重戎事由御史大夫爲工部尙書凡軍師之節制封部之
廉察盡如恭公太師之命焉茹荼雪泣祇服丕矩以國僑之
遺愛知公業之不亡生極榮號沒有愍冊揚名以繼志善訓
以克家君臣父子之道斯爲至矣褒大臣所以尊王命懿武
事所以恢天聲敢摭馨香以識冥冥銘曰帝在法宮推心懋
功汎汎彭城秉義納忠幽都朔易賜履來宅便蕃渥命焜燿
嘉績北戎病燕從古已然懷來蕩定勇略昭宣變和之重公
作霖雨師律之嚴公爲齊斧廓開祲沴振奮威武保大定功

庶人尊主卻穀敦悅乃主成師善經義府公實似之北伐刻銘西征賦詩播於工歌列在鼎彝壯猷未極大暮如斯華首童牙辛酸涕洟義方紹續君命吉祿孝在無改恩延必復參差輅葆澶漫陵谷勒石下泉幽元昭燭

周寶禹鈞墓在縣西北十五里寶家莊

縣志 范仲淹寶諫議陰德碑寶禹鈞范

陽人爲左諫議大夫致仕諸子進士登第義風家法爲一時標表馮道贈禹鈞詩曰燕山寶十郎教子有義方靈椿一株老丹桂五枝芳人多傳誦禹鈞生五子長曰儀次儼侃僖儀至禮部侍郎尙書儼爲翰林學士侃右補闕儼右諫議大夫參知政事僖起居郎初禹鈞家甚豐年三十無子夜夢亡祖亡父謂之曰汝早修行緣汝無子又壽不永禹鈞諾鈞爲人素長者先有家僕盜用房廊錢二百千僕慮事覺有女年十二三自寫一券繫臂上云求賣此女以償所負自是遠逃禹鈞見女契甚哀憐之卽焚券留女囑其妻善視之及笄以二百千擇良配得所歸僕聞之還歸感泣訴前罪禹鈞不問父子由是圖禹鈞像晨夕以祝公壽嘗於元夕往延壽寺忽於佛殿後得金三十兩銀二百兩持歸明日詣寺候失物主須臾一人涕泣至公問所因具以實告曰父犯罪至大辟至親戚處貸得金銀若干將以贖父罪昨暮以相知治酒昏忽失去今父罪不贖矣公遂與之同歸還以舊物仍加贈焉其同宗及外姻甚多貧困者有喪不能葬公爲出金葬之凡二十七人親舊孤遺有女未能嫁者公爲嫁之凡二十八人或與公有一日之雅遇其窘困則擇其子弟可委者隨多寡貸

以金帛俾之興販自給由公而活者數十家以至四方賢士
賴公舉火者不可勝數每視歲之所入除伏臘外皆以濟人
之饑居惟素儉器無金玉之飾家無衣帛之妾於宅南建書
院四十間書數千卷禮文行之儒居師席遠方寒士貧無所
就師友無供需者公咸資之無問識與不識有志於學者聽
其自至故子弟聞見益廣凡四方之士由公門登貴仕者前
後接踵來拜公前必命左右扶公坐受其禮及公之亡有持
心喪以報公德者先是公夢亡父後十年復語公曰汝有陰
德特延三紀之壽賜五子各榮顯公享年八十二歲沐浴別
親戚談笑而終五子八孫皆通顯於朝後之教子必曰燕出
寶十
郎云

謹按長安客話云今涿州西二十里有禹鈞墓人呼爲十
郎冢據日下舊聞考云墓前石碣爲明正統時太監竇吉
祥墓惟碣文內稱吉祥宋學士儀九世孫葬於康河之陽
祖塋之次今涿州團柳村北有河形舊名康河北岸上有
荒邱據此則禹鈞墓似在涿州碣文所稱或儀墓與禹鈞
別葬亦未可知

金韓夔墓在縣南二十五里高舍村墓北韓懿附葬

縣志

元梁斗南墓在縣南三十里立教村

縣志 謹按縣志又云梁斗南登元進士第一

累官至河南都運相傳斗南讀書閭山與同舍生論及鬼神斗南以爲不足畏同舍生曰閭山廣甯廟汝夜能獨往乎斗南諾之乃約聖壁爲驗至則遙見燈燭聞曰丞相來燭盡滅隨以筆聖殿壁至東北隅暗中觸一物捫之則人也攜以歸乃一女子有殊色問其故曰妾蘇州人因清明觀擊毬忽怪風晝晦昏迷不知至此事聞詔以女配斗南人謂天賜夫人

元徽政院使諡忠獻張九思墓在縣南

道園集 虞集撰神道碑世祖皇帝既受

天命適定國都建號紀元立朝廷宗廟社稷官府君臨萬方若稽古制定國本以係天下之心卽其都邑立元子爲燕王兼中書樞府之長未幾冊拜皇太子是爲裕宗皇帝初世祖盡得天下之豪傑而用之以成大勳建大業而執事於東宮者文武才能之士彬彬可見矣迺若身受信任委寄之重終始宮府之事其忠愛之心信於朝廷著於簡冊則未有過於魯國忠獻張公者也公以至元二年見裕皇於東宮卽受知遇常侍左右七年以父蘇州節度任官當外補裕皇愛其才留不遣數年伐宋取之盡收其府藏貢賦輸至於內府而析入於東宮者儲待充斥司會不能舉其數十六年置都總管以治其貨用命公爲嘉議大夫工部尙書兼領之創法嚴整至於今守之十九年丞相阿合馬方用事祇僧高菩薩千戶

王著乘人心之不與構變圖殺之時裕皇方從上北巡賊乃結黨數百人僞爲儀服器仗矯稱皇太子夜扣建德門啟鑰而入直抵太子宮西門傳令開宮門公方留宿禁中遽起叱戶者毋得擅啟關使語傳令者曰他時殿下還宮必以完澤賽羊先請見二人則啟關矣賊乃計窮往返數四氣益索知不可給循牆而南行且語曰前門可入也公偵聞之曰其詐明矣亟遣人走告守前門者而賊已至急呼阿合馬出與左丞郝俱俱爲賊擊死變起倉卒中外不知所爲公遣宿衛士馳射擊討賊敗得詐狀賊誅死而宮闔晏然則公精密持重決斷之力也樞密副使張易素稱有權略爲上信倚故以有密留京賊之入也傳太子令索兵甚遽易不能辨其僞不敢抗以兵與之坐棄市而論者以爲易知謀請傳首郡邑公入告裕皇曰張易不察賊詐而與之兵罪至死宜矣而謂其預賊謀則無也大臣被罪而死傳首則過矣裕皇悟言諸上而從之公遣士討賊時右衛指揮使顏進在行中矢死而怨家指以爲賊黨法當籍其帑公曰吾實使之討賊而死焉可誣也賊起變京城中至爲僞太子故上與太子甚惡之獄起連坐者禍不測莫敢爲言公挺身明此二人議獄者得致其平允云於是上更化相和禮霍孫革宿弊而新之公首薦易州何公瑋東平徐公琰馬公紹獻州范公芳裕皇次第用之何參議中書徐爲左司郎中范爲右司郎中馬爲刑部尙書侍從以下因公言而見用者徧布朝宇一時號爲得人公惟賢才是達不以疏遠親密爲取舍是以能若是其沛然也是年冬十月立詹事院拜公詹事丞公內謹侍衛外肅僚屬出納

緩急思遠而慮周得宮臣之體也則又曰輔導德性則在於老成重厚有經術學問之士其關係甚重也於是立賓客論德贊善等官召用上黨宋公道保定處士劉公因曹南夾谷公之奇東平李公謙諸君子公每候宮中閒暇時身先後其出入使得致其開導之說二十二年裕皇卽世詹事院無所受事時議將請廢之雖宮府舊僚不能無惑志公抗言曰有皇孫在固宗社之所屬人心之所繫也奈何爲此言乎廷臣以爲當三十年丞相完澤薦公曰昔祆僧之亂能審詐以禦變者也遂拜中書左丞仍兼詹事丞是年世祖崩成宗卽位追尊裕宗册母后爲皇后後卽東宮爲隆福宮以奉之改詹事院爲徽政院公爲徽政副使餘如故十一月進資德大夫中書右丞國史院修世祖裕皇實錄公以舊臣在中書習知典故預其比事之司馬大德二年拜平章政事力辭機務遂以平章之名預中書事徽政副使如故元貞大德中皇太后母儀東朝保佑匡正之功天下頌稱焉故徽政之任重儼朝省而公小心謹慎通練識大體事無鉅細裁決可否待公一言而後定聞望所在莫或比隆五年改授大司徒徽政副使領將作院事凡宮室服御之事土木金石絲縷采色之工經公指授製作精異非衆思所及受事者若怠且不中程懲之無少貸及以成功獻必極道其善而賞賚之故人得盡其技而樂於趨事蓋善用人之道也上以公老且病賜小車得乘以出入殿門諭之曰朕知卿必以禮辭誠念卿宮府之舊不忍卿步履之艱也其勿固辭旣而又詔曰昔在東朝卿於事無所違缺朕素念之今佐朕理天下如詹事時朕所望也且

具計於外庭時人榮之六年加光祿大夫公之事上涖官也
夙夜無懈以家政盡屬其弟九儀而故嘗治園於南門之外
作堂曰遂初花竹水石之勝甲於京師常以休沐與公卿賢
大夫觴詠而樂之治具潔豐水陸之珍畢具車蓋相望衣冠
偉然從容論說古今以達於政理藹然太平人物之盛於斯
見之非直爲一日之樂也然公之心未嘗侈然自逸故東朝
嘗又賜別墅或勸公可以少休乎公曰不然人臣有汗馬之
勞伐越之績旣老而衰得謝而樂其餘年禮固有之我受裕
皇皇太后知遇致身若此報稱之私惟日不足鞠躬盡瘁死
而後已老臣之心也故以勤勩而終其身云公幼有英質入
鄉校讀書識古人之意以大器自許旣歸不忘其初裕皇幼
冲時世祖命儒臣勸之學是以於儒術常留意焉公嘗進言
曰京師首善宜建國學以風示天下裕皇聽之學之有宮公
實開之於先也大都之學在南城公曰昔嘗遊焉吾不敢忘
也春秋釋奠於先聖先師公必具牢醴以相執事者二十餘
年不廢又爲學舍於四邑鄉曰吾先人之所居也願與其子
孫昆弟講習於斯焉好賢樂善出於天性寒畯之士四方來
歸因材而用之宗族鄉里疾病死喪惻孤無以爲依貧困無
以爲生者隨周之皆有其道公德業之盛豈偶然哉大德六
年十二月有大星隕於其第二十四日公薨年六十一追贈
推誠翊亮功臣開府儀同三司太傅上柱國魯國公諡忠獻
後二十九年爲天曆三年其子金界奴世其官爲大都留守
天子建奎章閣以觀圖書而敦德性特任之爲都主管工事
日見親近上愛其能而思其父之忠也賜之神道之碑而命

臣集著文以刻之謹按公諱九思字子有姓張氏其先大都宛平昌平鄉人曾祖贈資善大夫中書右丞清河郡公諡安恭曾祖妣贈清河郡夫人祖贈榮祿大夫平章政事魯國公諡康懿祖妣贈魯國夫人父滋薊州節度使贈銀青榮祿大夫大司徒魯國公諡莊惠妣贈魯國太夫人公娶唐氏翰林學士承旨脫因之女弟世祖又賜以趙國文貞劉公秉忠之女今皆封魯國太夫人子三人曰誠早卒曰椿童承德郎同知織染雜造人匠總管府事亦卒曰金界奴嫡夫人唐氏出也公薨時唐夫人年三十金界奴方七歲家法雍睦嚴而有教武宗皇帝在位母子相攜持入見興聖太后上嗟悼久之命加恩焉金界奴年十二已備宿衛甚稱旨意事歷朝皆有功今爲奎章閣都主管公事資政大夫大都留守內宰隆祥總管府總管提調織染雜造人匠都總管府事兼領中興武功庫事孫三人同知之子曰安孫習父職爲同知織染雜造人匠總管府事留守之子曰壽童襲世職領隆福宿衛次曰福童張氏先塋在昌邑鄉塋隘故遷公之墓於良鄉縣之南原嗟夫國家建元以來至於今治平七十年矣京師富貴之家興替消長於歲時旬月之間何可勝數而公安富尊榮豈弟壽考而其子年在齠齔已起而繼之精敏修飭有聞於時父子遭逢國家之盛無小間而聖上之眷遇方未艾不亦盛哉臣集奉詔紀實爲銘詩曰猗歟魯公盛德有容起事裕皇夙夜匪躬世祖聖神屬國元子國有大政是詢是理於穆裕皇仁孝以承孰佐天宮衆賢彙興肅肅以朝雖離以養一人以甯萬國咸享明堂孔陽制度考文秩秩春宮亦諗多聞時

惟魯公進見退食輯思無遺以究厥職孰輔道義國有老成
授几設醴公爲導迎寶藏王府禮在不曾公視其總有正無
悖臣作福威盜乘其間不虞突來公能識姦羣疑旣亡宮壺
亦固不軼不驚惟公之故文母皇皇聖孫之將隆福有宮萬
民所望徽音安安以出政紀匡之翼之公將其旨相臣進賢
虛左待之造於兩宮有猷有爲至元之治於斯爲盛民物阜
康法令修整耆壽俊乂樂乎熙辰公爲詠歌以燕家賓時之
方殷而公不待生榮死哀君子之慨顧瞻其家有木維喬袞
衣朱輪相繼以朝嗟此喬木豈維在宅南原有封亦長松栢
松栢允允垂三十年有子孔嘉克象其賢佩玉垂紳入侍天
子左有鼎彝右有圖史天子曰嘻爾惟舊人宮中府中懷爾
先臣神道有石可載功德迺命太史著文以刻廬川沄沄西
山峨峨山夷川
湮茲銘不磨

明侍御楊雪堂墓在縣南舊店西北

明太保李如栢墓在縣治西北崇各莊

明李懷中墓在縣治西北崇各莊

明張鑽墓在縣東南魯村

明贈中憲大夫江西道監察御史張哲吾墓在縣南魯村

明唐斯盛墓在縣治東誥封懷遠將軍

明楊太守九春墓在縣南舊店

以上俱縣志

明少師吳中墓在城北怪它村東

雍正志

固安縣

周孫贍墓在方城村東南一里許有石門

縣志

按房山縣亦有

孫贍墓康熙時知縣羅在公得墓誌始知在房山者爲唐將

軍孫士林墓云

日下舊聞考

金張君墓在押敵村西北一里有石刻云故贈儒林郎清河

張君之墓明昌二年立石墓前石獸尙存

縣志

元宋侯墓在駝頭村西南半里有石刻云大元故武略將軍

大都路都總管府判官宋侯墓翰林學士歐陽元書至五十

四年立石

縣志

按墓今無考

日下舊聞考

元宣使張士遠墓在唐陽村

明傅好禮墓在縣東知子營

大清一統志

明王騏墓在縣西一里子復墓附焉

雍正志

謹按今縣志云在豐樂門西一里許

明鄉賢張素墓在宣使墓傍

縣志

明都御史淡成墓在豐樂門西一里許

明都御史蘇志臯墓在豐樂門西一里

明侍郎劉永墓在豐樂門東北半里許

明鄉賢楊和墓在孫郭村東南

明都御史高澄墓在縣境

明都御史諡介穆張允濟墓在縣北

明都御史特贈兵部侍郎郭光復墓在清河西半里許

明太僕寺卿狀元楊維聰墓在孫郭村

明翰林院侍讀榜眼楊維傑墓在孫郭村

明副使馮繼墓在梁家莊

明臨江知府張承敘墓在縣境

明太僕張思誠墓在縣境

明杭州司馬李天祥墓在南房村東北

明柘城知縣于進善墓在縣境

明內黃教諭李時康墓在東關李家場

明茂州知州祖志伊墓在東嶽廟後堤內

國朝上江巡按劉宗韓墓在南房村

國朝南安知縣李棲墓在小西湖村東

國朝江西道監察御史卜峻超墓在白村

國朝贈光祿大夫都統于安國墓在城南三十里南房上村上

均縣志

永清縣

元史氏先塋在縣西北大焦垓村

縣志

謹按墓有崔鉉撰史氏慶源之碑久經土狸乾隆四十二

年知縣周震榮命工從土阜中搜出植立墓旁文字殘泐

故未錄

元史秉直墓在縣西北大焦垓

縣志

劉祁撰神道碑略公諱秉直字正道大興永清人

祖倫父成珪皆隱德不仕以財雄鄉里公自幼有成人度儀狀魁偉義氣不羣讀書略通大意不喜為詞章學孝親友弟為族屬軌儀鄉人皆指以教子弟當大兵南下所向摧陷公與其親族謀曰今茲喪亂流血成川吾家百餘口何以自免若散匿數處或可得生不然無遺類矣既而知降者得免乃復議降公方念之其散匿者皆集因相謂曰天也率里中老幼數千口詣太師國王軍門自歸王嘉其誠款接納特異由是數千口皆得生王欲用公辭以母老薦其子及弟王命公